

Vun driweriwer

erscheint auf www.lenauheim.de

monatliche
Erscheinung

Januar 2020

von *Helen Alba*

Sich de Gude angetun

Zur Kur in Busiasch

Wann mer in eem gewisse Alter is, soll mer ach etwas for die Gsundheit tun! Also han mer uns ausgangs 2019 entschloss: Mir fahre uf Busiasch zur Kur. Gsaat un gemacht – mir han unser Bindl gschniert un sin gut im Kurhotel Parc ankumm, han e scheenes Zimmer mit Balkon zugewies kriet un neugierich druf gewart, was uns die Kurdokterin for Behandlung verschreiwe werd. Die hat uns dann e Morjet druf erschtmol verschennt, weil mer seit Johre in de Landes-Kurorte rumtorkle un uns bisher nit entschloss han, uns in Busiasch behandle zu losse. Weil der Badeort soll am geeigneteschte sin for unser Wehwehchen. Iwerhaupscht die Mofetten - do solle die beschte sin, die sogar rar uf der ganzi Welt sin. Mir han zehn Täch lang dann im Mineralwasser gebad, han die Mofetten iwer uns ergehn gelosst un ach bei der Physiotherapie die Prozedure gut iwerstann. Sogar Internet-Zugang han mer in unsrem Zimmer ghat, e Fernseher un Eiskaschte ach. Also kann mer ruhich saan: alles bikobello!

Zu jeder Auskunft bereit

Gut han uns betreit/behandelt, sie ware zu jeder Auskunft bereit, des ware unser Ansprechpartner: Adelina Kott, Chefassistentin, Lili Buharu, Physio- un Kinetotherapeut, un Sorina Stef, Physiotherapeut. Sie han erklärt, welchi Behandlungsmethoden in der Physiotherapie Schmerze lindre kenne: Hydrotherapie (Bäder), Kurzwellentherapie, Elektrotherapie, Ultraschall, Magnettherapie, Massagen, Krankengymnastik un anres mehr.

Iwer de Badeort Busiasch

Die natierliche Heilfaktore im Bad Busiasch sin die Luftionisierung un es Mineralwasser, des was Kohlensäure, Bikarbonat, Chlor, Natrium, Kalzium, Magnesium un Eise enthalte tut. Des Mineralwasser kann mer sowohl zur Aussenkur (CO₂-Bäder) als ach Innenkur (Trinke) verwenne. In Busiasch kann mer sich ach mit truckenem Kohlendioxid behandle losse – des sin die Mofetten, sie han stark guti Wirkung uf de Kreislauf un die Durchblutung. Solchi Mofetten sin selten uf der ganzi Welt. Sie were unner kontrollierte Bedingunge als Heilgase genutzt. Ingfasst, umgebaut un mit Treppe ausstatt, stehn die Patiente im Mofetten-Raum uf verschiedene Treppe, wie des halt vum Dokter verschrieb is gin. E Kur in Busiasch soll mehreri Krankheite lindre: Herz- un Kreislaafkrankheite, Neurose, Zuckerkrankheit, Nervensystem, Niere, Speiseröhre. Es Busiascher Mineralwasser is schon 1796 chemisch analysiert gin. Die Heilkraft vum Wasser is awer erscht zwischer 1805 – 1811 vun Dr. Johann Bernhard Lindenmayr entdeckt gin. Selmols sin ach die erschte Gäscht in Busiasch ingetroff, um Mineralwasser zu trinke, Badegäscht sin erscht später ingetroff. 1839 is Busiascht amtlich zum Kurort erklärt gin un 1874 hat mer es erschti Mineralwasser-Freibad Europas do ereffnet. Prominenti Kurgäscht ware uner anre Kaiser Franz Joseph I. vun Österreich, Kronprinz Ferdinand un Keenich Ferdinand I. vun Rumänien.